

O‘zbekiston Respublikasiga olib kirilayotgan o‘simliklar karantini nazoratidagi mahsulotlar va transport vositalarini nazoratdan o‘tkazish

1. O‘zbekiston Respublikasiga olib kirilayotgan o‘simliklar karantini nazoratidagi mahsulotlar va transport vositalari o‘simliklar karantini davlat inspektorlari tomonidan davlat chegarasidan o‘tish joylarida tashkil etilgan o‘simliklar karantini chegara maskanlarida nazoratdan o‘tkaziladi.

O‘simliklar karantini davlat inspektorlari O‘zbekiston Respublikasiga avtomobil, havo va temir yo‘l transporti orqali olib kirilayotgan o‘simliklar karantini nazoratidagi mahsulotlarni hamda pochta jo‘natmalarini qabul qilib olishda bevosita ishtirok etadilar.

2. O‘zbekiston Respublikasiga olib kirilayotgan o‘simliklar karantini nazoratidagi mahsulotlar tushirishga qadar shuningdek, tushirish va ortish jarayonida birinchi marta (birlamchi) karantin ko‘rigidan o‘tkaziladi.

Ushbu mahsulotlarni ikkinchi marta (ikkilamchi) karantin ko‘rigidan o‘tkazish esa bojxona hujjatlari rasmiylashtiriladigan hududdagi o‘simliklar karantini davlat inspektori tomonidan mazkur Nizomga 2-ilovaga muvofiq shakldagi transport birligini ochish dalolatnomasi rasmiylashtirilgan holda hamda eng kam oylik ish haqining bir baravari miqdorida to‘lov amalga oshirilgandan so‘ng o‘simliklar karantini ko‘rigi yoki laboratoriya tekshiruvi o‘tkazish uchun ulardan belgilangan tartibda namunalar olish yo‘li bilan amalga oshiriladi.

3. O‘simliklar karantini nazoratidagi mahsulotlarning yuzasida karantindagi zararli organizmlar mavjud bo‘lmasa, o‘simlik mahsulotlarining fitosanitar holatini aniqlash uchun o‘simliklar karantini chegara maskanlari inspektorlari yuk partiyalaridan belgilangan tartibda namunalarni tanlab oladi va nazoratdan o‘tkazadi.

Olingan namunalarda o‘simliklar karantini ko‘rigi yoki laboratoriya tekshiruvi natijasida o‘simliklar karantini nazoratidagi mahsulotlarda o‘simliklar karantinidagi va boshqa zararli organizmlar mavjud emasligi aniqlansa, ushbu yukdan foydalanish uchun o‘simliklar karantini davlat inspektori tomonidan mazkur Nizomga 2a-ilovaga muvofiq shakldagi o‘simliklar karantini ko‘rigi dalolatnomasi rasmiylashtirib beriladi.

4. Yuk va transport vositalarida karantindagi zararli organizmlar borligi aniqlansa, ularning namunalari tasdiqlash uchun tegishli o‘simliklar karantini laboratoriyalariga yuboriladi. Ushbu zararlangan o‘simliklar karantini nazoratidagi mahsulotlarni belgilangan tartibda zararsizlantirish va yuk jo‘natuvchiga qaytarib yuborishning imkoniyati mavjud bo‘lmasa yo‘q qilinishi lozim.

5. O‘zbekiston Respublikasining chegara maskaniga etib kelgan avtomobil, havo va temir yo‘l transporti ekipaji a‘zolari qo‘l yukida o‘simliklar karantini nazoratidagi mahsulotlari bor-yo‘qligini ko‘rsatishlari va agar mavjud bo‘lsa, ularni karantin nazoratidan o‘tkazishlari shart.

6. Avtomobil, havo va temir yo‘l transporti vositalari va ularning yuk xonasini ochib ko‘rish chegara maskanidagi o‘simliklar karantini davlat inspektori talabiga binoan ushbu transport vositalarining vakillari, haydovchilar yoki yuk egalari bilan birgalikda amalga oshiriladi.

7. O‘zbekiston Respublikasiga kirib kelgan avtomobil, havo va temir yo‘l transporti vositalari o‘simliklar karantini nazoratidagi mahsulotlardan bo‘shatilganidan keyin transport egalari tomonidan, yuk olib borish mo‘ljallangan joyda esa yukni qabul qilib oluvchi tomonidan tozalanishi lozim.

8. Yuk bo‘shatilgan transport vositalarida karantindagi zararli organizmlar borligi aniqlansa, o‘simliklar karantini davlat inspektori ushbu transport vositalarini zararsizlantirish uchun ko‘rsatmalar beradi va bajarilishini nazorat qiladi.

9. Transport vositalaridagi karantindagi yoki boshqa xavfli zararli organizmlar bilan zararlangan oziq-ovqat zaxiralari o‘simliklar karantini davlat inspektorining ko‘rsatmalariga binoan transport vositalari bilan birgalikda to‘liq zararsizlantirilgunga qadar O‘zbekiston Respublikasi hududida bo‘lishi, omborxonalarda saqlanib plomba bosib qo‘yilishi lozim.

10. O‘simliklar karantini nazoratidagi mahsulotlar ushbu Nizomning 18-bandida nazarda tutilgan ikkilamchi karantin ko‘rigidan o‘tkazilganidan keyin, laboratoriya ekspertizasi uchun zarurat bo‘lmasa, ushbu mahsulotlar kelib tushgan joydagi hududiy o‘simliklar karantini davlat inspeksiyasi tomonidan mazkur mahsulotdan foydalanish shartlari to‘g‘risida xulosa chiqariladi va bajarilishi shart bo‘lgan fitosanitar tadbirlari belgilanadi.

11. Karantin va boshqa xavfli zararkunandalar, o‘simlik kasalliklari va begona o‘tlar bilan zararlangan o‘simliklar karantini nazoratidagi mahsulotlarga nisbatan zararsizlantirish va tozalashning samarali tadbirlarini qo‘llashning imkoni bo‘lmasa, ular belgilangan tartibda eksport qiluvchi mamlakatga qaytarilishi yoki yo‘q qilinishi (maxsus joyda yoqib yuborish yoki chuqur qazib ko‘mib tashlash yo‘li bilan) lozim.

12. O‘simliklar karantini nazoratidagi mahsulotlar solingan pochta jo‘natmalari va banderollar O‘zbekiston Respublikasiga etib kelganidan keyin o‘simliklar karantini nazorati va laboratoriya tekshiruvidan o‘tkazilishi lozim.